

元

詩

紀

事

第七冊

PL
2534
.C4
v.7

YORK UNIVERSITY

JUN 5 - 2001

EAST ASIAN STUDIES

元詩紀事卷二十一

侯官陳衍緝

黃公望



公望字子久自號大癡哥富春人

西湖竹枝集少有大志試吏弗遂歸隱西湖笱簋泉詩工晚
唐畫獨追關仝其據梧隱几若忘身世蓋游方之外非世士
所能知者也

西湖竹枝詞

水仙祠前湖水深岳王墳上有猿吟湖船女子唱歌去月落滄波無

處尋

詳燕不
花下

題雲林畫

遠望雲山隔秋水近看古木擁陂陀居然相對六君子正直特立無偏頗

珊瑚網倪雲林六君子圖跋廬山甫每見輒求作畫至正五年四月八日泊舟弓河之上而山甫篝燈出此紙苦徵畫時已憊甚只得勉以應之大癡老師見之必大笑也大癡詩云云朽木居士云云吳興錢雲云云

又此圖因大癡詩有居然相對六君子句遂名其圖乃松柏樟楠槐榆六樹行列修挺疎密掩映位置得宜而皆在平地且氣象蕭索有賢人在下位之象豈感當時胡運否塞高流隱遁而爲是歟廬山甫別號白石先生妙香道者識於藥房

雲號泰窩道人吳興人

題雲林六君子圖

黃公別去已多年忽見雲林畫裏傳二老風流遼鶴語悠然展卷對

江天

見黃公
望下

吳鎮

鎮字仲珪嘉興人自號梅花道人
有梅花菴稿

六研齋筆記吳仲圭將歿命置短碣塚上曰梅花和尚之塔
人或怪之曰此有意久當自驗未幾楊髡毀掘江南諸墳卽
林和靖孤山之骨不免發露仲圭以碣所署疑爲釋流竟免
案此不足信是時鎮未死

自題畫

枝枝自參差葉葉無限量不根而自生換却諸天相

六研齋筆記吳仲圭爲松巖和尚寫竹枝一卷簡淡蕭遠有天成之趣自題云云至正庚寅梅沙彌奉爲松巖和尚助喜

墨菜畫卷

菰根脫地翠毛溼雪花翻匙玉肪泣蕪萸金谷暗塵土美人壯士何顏色山人久刮龜毛氈囊空不貯挪揄錢屠門大嚼知流涎淡中滋味吾所便元脩元脩今幾年一笑不直東坡前

鐵網珊瑚自跋梅花道人因食菜糜戲而作此友人過廬索墨戲因書而遺之聊發同志一笑也至正己丑

平林野水圖

平林方漠漠野水正湯湯蒼莽日欲暮年華客異鄉草店月初冷村

路迂更長渡頭人散後漁父正鳴榔

清閼閣集元初眞士嘗居嘉禾紫虛觀好與吳仲珪隱君游
故得其詩畫爲多今年十月余始識元初卽出示此幀命僕
賦詩因走筆次吳隱君詩韻題於上隱君自號梅花道人云
至正二十一年歲在辛丑倪瓚記

倪瓚

瓚字元鎮無錫州人嘗自謂懶瓚亦曰倪迂有清閼閣稿
雲林遺事蹤跡多在松陵笠澤間陸莊有蝸牛廬則其嘗棲
止處荆溪善權離墨銅棺其游甚數嘗避兵泖上有出泖詩
又閣前置梧石日令人洗拭及苔蘚盈庭綠縵可坐每遇墜
葉輒令童子以針綴杖頭刺出之不使點壞

元鎮好僧寺一住必旬日篝燈木榻蕭然宴坐時操紙筆作竹石小景客求必與一時好事者購之價至數十金壯年有巨幅雅宜山圖甚爲當世所珍元鎮又有雅宜山竹枝詞二首云雅宜山舊名娜如山蓋虞道園所命名然未若娜如之名近古也

又張士信聞元鎮善畫使人持絹縑侑以幣求其筆元鎮裂其絹而却其幣一日士信與諸文士遊太湖聞漁舟中有異香此必有異人近之乃元鎮也士信欲手刃之諸文士力勸免命重加箠辱當撻時噤不發聲後人問之元鎮曰出聲便俗

七修類稿入國朝盡散其產不過其稅而催科者集其室逃

入蘆洲熱龍涎以自適因香被執囚於有司每傳食命獄卒
舉案齊眉卒問其故不答旁曰恐汝唾沫及飯耳卒怒鎖之
溺器之側衆雖爲祈而免憤哽成疾今人以漁舟之香爲祥
止庵太祖因得而誅以元鎮爲太祖投之廁中皆非也

寄王叔明

能詩何水部愛石米南宮允矣英才最居然外祖風釣絲煙霧外船
影畫圖中他日千金積陶朱術偶同

又

幾夢山陰王右軍筆精墨妙最能文每憐竹影搖秋月更愛山居寫
白雲祕笈封題饒古趣雅懷蕭散逸人羣今年七夕聞多事曝畫繙
書到夕曛

西湖志餘王叔明蒙其先吳興人趙文敏公之甥也隱於仁
和之黃鶴山號黃鶴山樵善詞翰畫學王維與吳興倪元鎮
詩畫齊名元鎮嘗寄之詩云云又云云

絕句

松陵第四橋前水風急猶須貯一瓢敲火煮茶歌白苧怒濤翻雪小
停橈

又

人家住近江城外月色波光上下天風景自佳時俗異泊舟閒詠白
雲篇

又

白鷗飛處夕陽明山色隔江眉黛橫試看三高祠下水悠悠中有別

離情

清河書畫舫正月十四舟過吳江第四橋大風浪中貯水一瓢而去乃賦小詩云云是夜泊舟吳江城外人家水月皓然與希言理詠久之明日題壁詩云云十五日與希言謁三高祠望江上諸山爲寫隔江山色圖并賦詩贈別云云

題高房山尙書著色山水

白雲孤鶴暮知還晚泊錢唐看越山珍重今朝重展卷吟詩作賦北窗間

清河書畫舫房山高尙書以清介絕俗之標而和同光塵之內蓋千載人也僦居餘杭暇日策杖攜酒壺詩冊坐錢塘江濱望越中諸山岡巒之起伏雲煙之出沒若有得於中也其

政事文章之餘用以作畫亦以寫其胸次之磊磊者歟因閱
允同文學所藏著色山水一卷後有默菴賦詩展詠永日遂
紀尙書之一二并次默菴韻詩題畫上云倪瓚

懷歸

久客懷歸思惘然松間茅屋女蘿牽三杯桃李春風酒一榻菰蒲夜
雨船鴻迹偶留雪渚鶴情原止在芝田他鄉未若還家樂綠樹年
年叫杜鵑

中秋

經旬臥病揜山扉岩穴潛神似伏龜身世浮雲渡流水生涯煮豆爨
枯萁紅蠹捲碧應無分白髮悲秋不自支莫負尊前今夜月長吟桂
影一伸眉

雲林遺事老年遊歷江湖多寓琳宮梵刹有懷歸詩云云洪武甲寅還鄉時已無家寓姻親鄒惟高家是歲中秋鄒氏開宴賞月元鎮以脾疾戒飲淒然不樂乃賦詩云云不久竟以是疾卒於鄒氏

題畫

蕭蕭風雨麥秋寒把筆臨摹強自寬賴有君相慰藉松肪筍脯勸加餐

漁洋山人精華錄太液兄家舊藏倪元鎮畫自題云云此詩甚佳而雲林集不載

秋林山色圖

寓館風雨秋閒門草苔翳懷人思奮飛攜書此留滯玉琴和幽吟竹

牖聊靜憩西山日在望白雲淡生媚寂寞棲德園清虛捐世味石竈
有餘烟未收煮茗器

好古堂書畫記倪雲林設色秋林山色圖遠山帶夕陽色松
二絳葉樹一衰柳一樹幹多用渴筆平坡淺沙三數層石出
齒齒儼然霜寒水落境也上題云云八月二日寫秋林山色
并詩以遺伯循文學倪瓚

八月十八日蕭閒道館聽袁南宮彈琴是日風雨蕭然有感而
作

玉琴轉清亮風雨更飄飄疎桐蔭高館朱槿耀芳條生物曷可遏撫
事發長謠弱齡陪清讌檣髮想垂髫相見日以老離居夢且遙秋江
渺雲水去鶴影遙遙

草堂雅集余與元鎮初識時元鎮始弱冠余年六十今余年八十有六而元鎮四十餘矣蕭閒館東齋庭下向見盛鍊師手種二桐忽已十五年今桐蔭可蔽十車也因誦桓司馬樹猶如此人何以堪之語元鎮復賦此詩相與諷詠爲之泫然
袁矩書

題畫贈九成

故人郄掾史邀我宿溪船把酒風雨至論詩煙渚前晨興就清盥思逸愛春天復遇武陵守共尋花滿川

自跋至正十二年三月八日冒風雨過九成荆溪舟中劉德方郎官方舟煙渚留宿談詩明日快晴移舟綠水岸下相與嘯咏仰睇南山遙瞻飛雲夾岸桃柳相廁如散綺霞掇芳芹

而薦潔瀉山瓢而樂志九成出片紙命畫眼前景物紙惡筆
凡固欲騁其逸思大乏騏驥康莊也歐陽公每每云筆硯精
良人生一樂書畫同理余亦云焉時舟中章鍊師岳隱者對
弈吳老生吹洞簫

春日雲林齋居

池泉春漲深徑苔夕陰滿諷詠紫霞篇馳情華陽館晴嵐拂書幌飛
花浮茗盃階下松粉黃窗閒雲氣暖石梁蘿蔦垂翳翳行蹤斷非與
世相違冥棲久忘返

元詩選此詩集中又載改本云臨池春流駛掃地夕陰滿正
襟味道言超遙坐溪館嵐嶺當書榻煩襟一舒散靡靡松花
黃逐逐雲氣暖石梁青苔合於焉人跡斷故非與世疎冥栖

遂忘返元音所載卽此

饒介之云堂扁雲林二字雲字正摹天台白雲寺額林字摹廬山東林寺額皆右軍得意筆也

早春對雨寄懷張外史

林臥苦泥雨憂來不可絕掀帷望天際春風吹木末飛蘿散成霧細草綠如髮念子獨高世南山修隱訣撫弄無絃琴招邀青天月神安形不彫跡高行自潔思之不可見飢渴何由歇願爲鸞鵠翔南遊拂松雪

元詩選此詩集中又載改本云林臥對雲雨憂來不可絕褰帷望庭際春風動林樾飛蘿散成霧烟草綠如髮不見高世人飢渴何由歇神鸞戲玄圃巨鱗偃溟渤爾亦碧巖中遁形

修隱訣燒香庭竹淨洗研池苔滑取瑟和流泉操瓢酌明月
跡高行亦苦冰檠忌芳潔何當往相尋拂石棲松雪今新本
所刻竟自神鸞戲玄圃句起而題無早春對雨字不知何所
據也

竹枝詞

井序 錄五

會稽楊廉夫邀余同賦西湖竹枝歌余嘗莫春登瀕湖諸山
而眺覽見其浦溆沿洄雲氣出沒慨然有感于中欲托之音
調以申其悲歎久未能成章也因覩斯作爲之心動言宣爲
詞凡八首皆道眼前不求工也

錢王墓田松柏稀岳王祠堂在湖西西泠橋邊草春綠飛來峰頭鳥
夜啼

湖邊女兒紅粉妝不學羅敷春采桑學成飛燕春風舞嫁與燕山遊
冶郎

阿翁聞說國興亡記得錢王與岳王日莫狂風吹柳折滿湖煙雨綠
茫茫

春愁如雪不能消又見清明賣柳條傷心玉照堂前月空照錢塘夜
夜潮

啞啞歸雁度春江明月清波雁影雙化作斜行箏上字長彈幽恨隔
紗窗

元詩選倪高士詩集刻本係荆溪蹇曦編集所載竹枝詞八
首叙次甚明新刻本止載四首又不載小序而于楊鐵崖西
湖竹枝詞所載雜見集中并列朝詩選所錄二詩亦分兩處

鐵崖所載四首止第二首與此頗同附記于此其詞云鷓鴣
生長最高枝雁堦銜將向北歸天長水闊無消息只有空梁
燕子飛湖邊女兒紅粉妝不學羅敷朝采桑自從學得纖腰
舞嫁與城西遊冶郎愁水愁風人不歸昨夜水沒釣魚磯蹋
盡蓮根終無藕著多柳絮不成衣桐樹元栽金井西月明照
見影離離不比蘇公隄畔柳烏鴉飛過鵲鳩棲

因吳國良過玉山草堂輒賦長句奉寄

玉山樹色隱朝陽更著漁莊近草堂何處唱歌聲款乃隔雲濯足向
滄浪珍羞每送青絲絡佳句多投古錦囊幾問權船尋好事辟疆園
圃定非常

元詩選玉山主人欲延楊鐵崖于家塾鐵崖報曰必得當世

清雅高潔之士如倪雲林者一札至卽如約耳玉山因託雲林素相習者操舟出邀至玉山家已構別業悉如蕭閑清閤之製雲林驚喜請見玉山告以鐵崖之意欣然致書焉自是三人相與結驢往來無間

清明日風雨淒然舟泊東林西澣步過伯璇徵君高齋焚香瀹茗出示燕文貴秋山蕭寺圖展玩良久因賦一絕

野棠花落過清明春事怱怱夢裏驚倚櫂微吟沙際路半江煙雨莫潮生

元詩選舊本作清明後題云野棠花落又清明楊柳青青人耦耕春物闌珊成底事半江疎雨莫潮生

王冕

冕字元章諸暨人自號煮石山農有竹齋集

菽園雜記所居與一神廟切近爨下缺薪則斧神像爨之一鄰家事神惟謹遇冕毀神像輒刻木補之如是者三四然冕家人歲無恙補像者妻孥沾惠時時有之一日召巫降神詰神云冕屢毀神神不之咎吾輒爲新之神何不祐耶巫者倉卒無以對乃作怒曰汝不置像彼何從而爨耶自是其人不復補像而廟遂廢至今以爲笑談

玉壺冰買舟下東吳度大江入楚淮歷覽名山川或遇奇才俠客談古豪傑事卽呼酒共飲慷慨悲吟人目爲狂奴

宋學士集北游燕都館泰不花家泰不花薦以館職冕曰公誠愚人哉不滿十年此中狐兔游矣

霏雪錄游大都時臨川危素爲翰林學士居鐘樓街山農嘗見其文而不相識一日危騎而過山農所與之坐而不問其姓名徐曰君非鐘樓街住耶危曰然更不出他語而罷人問之山農曰吾觀其文有謠氣目其人舉止亦然料知必危太樸也

山棲志隱九里山種荳三畝粟倍之樹梅花千桃杏居其半芋一區薤韭各百本引水爲池種魚千餘頭結茅廬三間自題爲梅花屋

墨梅

我家洗硯池頭樹個個花開淡墨痕不要人誇好顏色只留清氣滿乾坤

應教題梅

獵獵西風吹倒人
乾坤無處不生塵
胡兒凍死長城下
始信江南別有春

七修類稿王冕身長多髯少明經不偶卽焚書讀古兵法戴高帽披綠簑着長齒屐擊木劍行歌於市人以爲狂士之負才氣者爭與之游平生嗜畫梅畫成未嘗無詩也有詩云云或以是詩刺時欲執之一夕遁後太祖物色得冕因與糲飯蔬羹山農且談且食上喜曰可與共大事授諮議參軍一夕暴卒應制作云云今竹齋集中未刻

水東日記初見太祖應制題梅云云睿意極眷想之

案列朝詩集應教詩下云余家有元章真蹟下二句云清高

只有老梅樹照水開花個個真

梅花屋

荒苔叢篠路縈迴繞澗新栽百樹梅花落不隨流水去鶴歸常帶白
雲來買山自得居山趣處世渾無濟世材昨夜月明天似洗嘯歌行
上讀書臺

鐵網珊瑚飯牛翁卽煮石道者閑散大夫新除也山農近日
號老村南園種菜時稱呼元章字冕名王姓今年老異於上
年鬚髮皆白脚病行不得不會奔趨不能諂佞不會詭詐不
能干祿仕終日忍飢過畫梅作詩讀書寫字遣興而已自喝
曰旣無知己何必多言呵呵

題畫飛白竹

瀟灑三君子是伊親弟兄所期持大節莫負歲寒盟

書畫史王元章飛白竹一軸題云己丑歲夏五月二十二日
會稽王冕寫云云赤城陶君九成故家子也淳粹雅澹有出
塵風韻讀書之暇每以翰墨自適余寓西湖之東九成時來
會談論竟日退有不忍舍者其仲季皆清爽真芝蘭玉樹不
下王謝家也遂題而歸之

句

生前不繫黃金帶身後空餘白玉簪 白石皆成佛蒼頭半是僧
閒居錄至元間釋氏豪橫楊總統發掘陵墓奪取宮觀孤山
和靖墳亦被發然無他物但得一白玉簪屍已空矣其亦仙
者耶王元章有詩云云後又鑿靈鷲山壁爲佛像時小民之

無賴者多爲僧以逞奸王復有詩云云亦佳

又

冰花個個團如玉羌笛吹他不下來

梧溪集平生嗜畫梅有自題云云或以是刺時欲執之一夕遁去

郊韶

韶字九成吳興人至正中辟試漕府掾自號苕溪漁者有雲

臺集

絕句四首

杏花簾幕看春雨深巷無人騎馬來獨有倪寬能憶我黃昏躡屐到蒼苔

春色三分都有幾二分已在雨聲中牆東兩個桃花樹恨殺朝來一番風

十日春寒早閉門風風雨雨怕黃昏小齋坐對黃金鴨寂寞沈香火自溫

春寒時節病頭風惆悵年華逝水同世事總如春夢裏雨聲渾在杏花中

清河書畫舫至正十四年二月二十五日雨郊君九成賦絕句四首云云倪瓚留宿高齋篝燈爲寫春林遠岫圖并次韻四詩題畫上時夜漏下三刻矣佩韋齋中書

陳方

方字子貞自號孤篷倦客京口人

元詩選如門前灌木春啼鳥屋畔長松夜宿雲天寒客裏輕
相別花落孤村喜獨來隨事感發鍛鍊最工

雲林生惠山圖次元韻

佳樹陰森欲礙空畫成夜落燈花紅絕憐帶經自鋤者未忍竟別天
隨翁汾河春雲散高柳湘水微茫綠於酒翁歸天末見青山臨風莫
負揮弦手

清閼閣集至正五年三月八日玄素先生來林下瓚乃賦詩
曰吳淞江水春映空波浪沄沄霞映紅耕田鑿井居其左令
我長懷甫里翁夢見維舟江畔柳剝啄敲門散盃酒整冠起
接平生歡石逕蘭芳重攜手雨後共步林下正見惠山先生
命瓚寫之畫訖因書此詩於上張外史陳先生見之必大笑

也倪瓚記

楊謙

謙號平山別號竹西居士又號清溪道士松江人

題貞期爲楊竹西草亭圖卷

翠玉蕭蕭在屋東主人號作竹西翁品題莫說揚州夢好寫閒雲入

卷中

六研齋筆記楊瑀爲江浙行省掾屬晚棲峰泖閒植竹千竿
自號竹西居士趙仲穆爲作圖楊廉夫爲作記自題句云云
仲穆詩云籬外涓涓澗水流竹西花草弄春柔茅檐相對坐
終日一鳥不鳴山更幽張伯雨詩云問訊揚雄宅深居在竹
西風林宜月影春日聽鶯啼東老應同樂南隣憶舊題東風

又花草相與及幽棲馬文璧云楊子宅前好修竹因看萬个
碧交加薰風滿簾吹蒼雪春雨充庖盡玉芽茶臼或聞來北
牖籜龍未許過東家時時仿佛揚州去拄杖尋君又日斜錢
維善詩曰爲竹移家亦苦辛我如東道竹如賓石頭路滑機
鋒峻峴首碑沈感慨新淡月半窗金弄影清風一徑玉傳神
明當拄杖敲門去愛汝草玄亭上人

案此詩李日華以爲楊元誠作癸集據松江志載楊謙別號
竹西而引謙不礙雲山樓歌詠事爲證又疑元誠謝歸鶴沙
時變易名號又疑日華筆記多舛誤未可爲據然癸集庚上
趙茂原櫺有楊竹西草亭圖卷詩序云至正乙未春余來浦
東張溪楊君平山植竹數百竿於西林結亭蒼翠閒扁曰竹

元詩集卷之二
西因以爲號焉云云平山爲楊謙號其非元誠無疑

不礙雲山樓歌

海之雲兮油油雨我田兮有秋海之山兮離離障我流兮東之
雲之動兮蹺蹺吾與雲動兮動而不遷山之靜兮層層吾與山靜兮
靜而不停

楊維禎不礙雲山樓記至正九年余抵松之張溪溪之東有
大族爲楊竹西氏居之南扁其樓曰不礙雲山竹西宴於樓
之上牕戶四闢萬頃之雲兩鰲之島皆自獻於眉睫之下竹
西風日佳時岸巾樓上手揮五絃之餘與一二解人談至理
旣以八牕無礙者闢於目復以八荒無礙者洞於心雲山之
觀盡矣備矣竹西憮然若有得起舉酒而自歌云云又歌云

云併錄其歌以爲記

沈良

良號華溪雲閒人

題王叔明倣董北苑風雨蕭寺圖

墨雲擁高山頃刻風雨至
劃然海潮聲草木爭偃地
曠野少人行山僧獨歸寺
衲衣盡沾溼敲戶何急事
倉皇前村民乘屋一何亟
一婢已抱瓮一婦更持器
重茅惜被卷破屋家所寄
戴笠者漁郎理網屈雙臂
老翁若望家擔物終不棄
陸走尙甚危水行可無畏
前溪風雨惡篙折水流駛
行者當早歸居者不豫備
北苑爲此圖黃鶴師其意
想見晚來晴雲淨山橫翠
始信霎時間眞宰特相戲

四朝詩

自跋余家有董北苑風雨蕭寺圖是思陵所題筆法高古精

絕叔明相訪出以示之稱賞不置念輒以贈之叔明爲臨此
卷余展賞題此俚言時至正庚寅秋七夕次日也華溪沈良
張監

監字天民金壇人至正閒避地荆溪

題秀野軒圖

井序

余昔遊吳中諸山至周氏秀野軒領覽天池玉遮之勝今數
年矣近歸寓軒獲觀周侍御之大篆朱提學之新圖恍然若
夢游也景安求余著語聊爾塞責耄餘才盡媿無佳語耳

我憶天池與玉遮幽軒水木澹清華笙竽遠振風林竹錦綺晴連曉
徑花山麓敷牀朝看雨澗泉漱石夜分茶番陽大篆睢陽畫不負春
陵處士家

秀野軒記吳人周君景安居餘杭山之西南其背則倚錦峯
之文石面則挹貞山之麗澤右則肘玉遮之障左則盼天池
之坂雙溪界其南北四山之間平疇沃野草木葱蒨卓然而
軒者景安之所遊息也軒之傍幽蹊曲檻佳木秀卉翠駢玉
映於闌楯之間得江浙行省左丞周公題其軒之顏曰秀野
以誌其美至正二十四年歲甲辰四月十日睢陽山人時年
七十有一朱德潤畫并記

沈廷珪

廷珪字德璋橋李人

題破窗風雨圖

劉君性嗜學孜孜事三餘孤燈破窗下簡編自卷舒瀟瀟風雨來吾

伊聲自知安貧人所難味道心常愉我聞顏子淵簞瓢陋巷居千載
稱亞聖聲價重璠璣又聞陶淵明所處亦敝廬蕭然環堵間左右惟
圖書吁嗟世之人惟樂耳目娛華居美飲食所務安其軀良心日以
斷疇能返厥初最哉劉孝廉聖賢以爲徒

鍾虞

虞字安期吳江人

前題

一室蕭然誰與同清如獨鶴寄樊籠詩成春草池塘上夢繞玉堂雲
霧中花氣每隨嵐氣入書聲時與竹聲通從容更覓新晴好臥看東
林日影紅

何恆

恆字

練川人

前題

一室蕭然四壁空
客懷况復雨兼風
溼沾衣服愁仍重
清到肌膚句
轉工知命肯隨時
變化甘貧宜爲道
汗隆夜深尙對羲
皇易應怪寒
燈不耐紅

珊瑚網破窗風雨記大名劉易性初氏避地吳中今年從吳興來見余草玄閣出玉坡周公所篆破窗風雨四大字求余文志之至正甲辰嘉平初吉東維叟會稽楊維禎

又破窗風雨卷跋劉君性初以破窗風雨自居諸公賦詩成卷因作此圖時至正廿六年歲在丙午暮春之初王蒙

石字

字宇宙亭

題劉孟功竹深處

高風遠市門植竹千簣簷蒼雪下庭砌元陰翳齊房晴旭仙聚島鮮
颯鳳鳴陽碧滋潤簡編翠浥浮冠裳披圖有真趣夙抱非羈寓遊蹤
自南北夢寐還相遇朝哦棲遁詞暮誦琳琅句悅卽故園居森森竹
深處

黃仲瑤

仲瑤字

號隆谿

竹深處詩

樂彼數畝園青青萬竿竹中有讀書人開軒伴幽獨軒前輕陰埽不
開軒後繁聲疑雨來春風淡蕩拂翠羽白露泠泠生莓苔入窗無塵

從不埽吐薜在地瓊花老夜深對月任光微晝永乘風覺涼好有時
早起坐石牀口中吹笙鵝管長有時枕書臥軒中清興窅入蓬萊宮
蓬萊宮闕幾千里紅塵不到看書几彩鸞紫鳳情翩翩一段清光照
流水昨日我來造竹下主人開門笑相迓山肴滿盤酒滿壺醉歌一
曲爲君謝豈不見園中桃又不見道旁柳昔日媚春華今日成衰朽
何如此君含彩故青青獨向軒楹託根久勸君更種松與梅歲寒清
絕成三友

鄧資深

資深字

號文江

竹深處詩

種得篔簹數百竿築亭深處伴秋寒危梢滴露清堪掬密葉籠雲翠

作團夜月虛濤翻素壁晚風清佩響雕欄漪漪絕勝淇園好會看窗
前宿鳳鸞

倪維哲

竹深處詩

吳門煙雨掩荆扉湘楚清兮一徑微叢覆蔽空忘晝永涼生入夜覺
寒歸王猷疎散人皆仰劉向操持世不違儒業已聞沾寵渥休將宦
思戀初衣

趙次進

竹深處詩

高人適幽趣羨此琅玕清新梢和露滴舊葉迎風鳴結屋住深處時
見茶煙橫焚香手遺編詎有塵慮縈一自綰章綬夢入吳中行覺來

尙幽意滿抱涼吹生

金灝

灝字

秀州人

竹深處詩

碧琅玕下覓幽蹤行盡齋居路始通
煙歛月梢金瑣碎風生雲幹玉
琤琮秋光滿座陰長合靛色清神暑自空
淨掃蒼苔夜留客解衣磅礴興無窮

珊瑚網錢唐張時竹深處賦序云姑蘇劉孟功先生性嗜竹
種之數萬竿蔚然成林孟功日居其中同志者過之輒留迺
取杜少陵句顏其所居曰竹深處鴻儒碩士咸爲之品題

陳樵

樵字居采婺州東陽人

西湖竹枝集居閭谷間衣鹿皮衣著書自號鹿皮子

夜闌曲

碧宇星回夜漫漫靈蕪烟煖重薰薦冷翠香銷青桂枝冰荷蓋光光
遶帷花樓艷舞金菱蕤吳羹蜀酒精瓊廩酒闌半解龍綃衣春朝曲
渚聞鷓鴣

七夕調

內人拜月金鋪戶鳳宿梧枝秋葉下露華入秋玉階寒織署錦工催
祭杼月下金鈿照骨明同心絲繪紅生縷素瓜碧實上繪樓夜闌颺
馭下銀州

瑤臺月

銀漢西流烏接翼回首人間化爲碧瑤臺月裏可避胡三郎錯落歸
魚鳧霓裳月裏親偷得又怪李羣偷壓笛

海人謠

海南蠻奴髮垂耳朝朝採寶丹涯裏夜光盈尺出飛魚柏葉收珠寒
葦葦幽箔連錢生綠花切玉蠻刀如切水九譯來朝萬里天北風不
動琅玕死

出塞曲

爲成潼關
李總管賦

屬鏤夜啼光燭地將軍一出櫬槍死行塵不動人歸市帶甲如雲自
天至取君甲兵爲君洗分明袖有銀河水手中遺下泥一丸不封函
谷封泰山

雁來紅

東朝一書成百戰上林一書旌節返又傳騎子一函書人不如禽解
邊難自從燕滅秦晉亡是非直到空中雁蘇郎寒絕雁來紅脚下胡
姬殘綵線願燕在北秦在西雁去雁來無是非

長安有狹斜行

長安出狹斜方駕秦中客云是牛丞相來自薄家宅薄家萬戶侯朱
門映椒壁長秋車馬來賓客御瑤席金屋貯尹邢阿嬌淚霑臆燕燕
慵來妝繁華照春色轉蕙光風翻趙帶徘徊月到班姬牀班姬輟芳
翰紈扇從風揚明姬門百草玉環御雲裝向來溫柔地盡入白雲鄉
何以慰王孫琵琶隨驢驢何以奉燕燕罷舞歌慨慷何以奉明妃綠
珠奏清商嫫母挾無鹽搔頭愛宮粧

大雅集評曰襲格不襲語善學小李者雁來紅狹斜行匠意

尤遠

北山別業三十八咏

太霞洞

冬春居此洞

石林深處飯胡麻，幾度登臨送日車。
雪到峰頭猶是雨，雲生石上半成霞。
相看露下朝華草，不放春歸冷艷花。
地冷遲魏紫姚黃風捲盡，人閒蜂蝶到山家。

鹿皮子集原注首二句一作山中穴處逞春和，洞下栽桃攬物華。
第五六七八句一作樹臨陰壑元無影，日傍晴崖不度花。
莫夜相過玩清月，山前鄰笛兩三家。

飛雨洞

盛夏居此洞，流沫成雨，中有小泓。

蜀天萬里入東州，冷翠侵扉翠欲流。
朱鯉有靈時出穴，白狐生火幾

元詩集卷二十一
經秋山中十暑寒猶在潭上千年雨未收昨日西林晞白髮濕雲依舊滿貂裘

鹿皮子集原注首句一作天梯石棧落東州

碧落洞

秋初入
居此洞

灝氣翻衣露滿懷人言天上我驚猜近從月裏種花去遙見鼎湖飛
葉來使我加餐有黃獨爲人題榜是青苔杖頭化作光明燭願逐東
皇下九垓

鹿皮子集原注又一首云聽盡東林夏雨聲自攜桐几下巖
扃白雲持得人誰寄明月攀來桂未生雨後引苔書洞榜霞
邊摘葉寫山銘如何地絕重黎後猶自披雲望玉京

蘿衣洞

蘿衣草帶護煙簑
楚國狂夫尙楚歌
石影到溪千丈勁
藤痕入水八分多
泉分小白山中雨
衣取雲門寺頂荷
洞口樵人誰語汝
棋邊相遇懶相過

鹿皮子集原注首句一作手携綠玉下山阿
第五六句一作卷中真跡臨紅葉
身上生衣捲碧蘿
又作僧披櫛葉收芝菌
客厭蘿衣種芰荷

五雲洞

飛梁壓水石苔蒼
洞口飛泉瀉石梁
屋上春霞常易散
雪中樹影不曾長
陰雲滿地晴飛白
雨蝶依林暗貼黃
手裏芙蓉渾忘却
蓑衣日日釣滄浪

鹿皮子集原注飛梁一作漁磯
第五六句一作松花入酒傳

香碧貝葉分題寫硬黃又作飯收菰蔣叢邊米藥聚梧桐葉

上霜

東白草堂

屋後茅籬與水平屋頭怪石列爲屏捲簾帳下雲先去步月庭前樹
欲行白雨侵階渾是綠黃童食柏久應青如何庭下朝陽影盡在少
微巖上明

鹿皮子集三四句一作齋餘瓢裏水猶活晦近花前月尙生
圓谷澗

水樂聲中共夕涼雪花片片灑衣裳山中古樹如魚大水上遊絲似
線長柳絮散爲萍梗紫花根染作牡丹黃自從西域神僧死澗上無
人識水香

鹿皮子集三句一作山中碩果如瓜大五六句一作采藥奴
舂菰作米談經人指樹生薑

泰素壇

竹死煙寒樹不榮石壇千仞與雲平春來天上元無色雨到人閒方
有聲夢入松風吹不斷詩如芳草剪還生陶山北望飛霞散夜半有
時孤鶴鳴

鹿皮子集七八句一作他年學製鄒生律盡種山樊與杜蘅

山齋

一名草
易臺

幾夜山中乍月昏晨朝挾冊傍初陽懸崖種菊紅多葉開戶見山青
一方石上韋編新汗竹研中白露半成霜羲皇未畫非無易石室遺
書不用藏

鹿皮子集三四句一作登臺望越丘陵遠開戶草玄枝蔓長

壺天

在澗左一作壺天閣

宮殿隨身信所如
寓形一室似樓居
神遊八極皆吾土
天入三山不滿壺
雨夜無人共清月
水扉幾度種丹魚
山童長怕漁舟至
不放桃花下五湖

鹿皮子集一作剎海中閒別一區
普香香積是通衢
花連葉蔓疑無路
天入靈山不滿壺
芥裏須彌空處有
階前地影月中無
自從漁父穿花去
不放桃花下石渠

西峴峰

雨後看山對酒歌
飛紅駭綠滿巖阿
萬重山外碧方寸
五色雲中青最多
亭下日生霞映草
松根苓長葉成窩
江源分付西流去
莫作門

前東逝波

鹿皮子集第二句一作紅銷綠漲草成窩五六句一作峯漸
欲危通月過路遮不斷奈春何

書房

休名不 死如麻挾冊空山望碧霞書在終難招李杜灰寒無處覓
陰何春歸一尺人閒淚雲暖萬重煙際花風景尙堪留研席浮生憂
樂向來多

鹿皮子集三四五六句一作門外雨生雲沒鶴松根苔長葉
成窩天雞颺下唐時綬越鳥銜來楚地花

句

掃葉僧將猿共爨賣花人與蝶俱還

筆精陳樵有詩一卷如云云殊有巧思

元詩紀事卷二十二

侯官陳衍縉

潘純

純字子素廬州合肥人晚居淮浙爲行臺御史大夫納璘子
安安所殺

輟耕錄子素嘗作輓卦譏世之仕宦人以突梯滑稽而得顯
爵者

題畫

阿翁作畫如說法信手拈來種種佳好水好山塗抹盡阿婆臉上不
曾搽

輟耕錄嘉興林叔大掾江浙行省時貪墨鄙吝然頗交接名

流以沽美譽其於達官顯宦則刲羔殺豕品饌甚盛若士夫
君子不過素湯餅而已一日延黃大癡作畫多士畢集而此
品復出譏謔交作叔大赧甚不敢仰視遂揖潘子素求題其
畫子素卽書一絕句云云大癡笑謂曰好水好山言達官顯
宦也阿婆臉不搽言素面也言未已子素復加一句云諸佛
菩薩摩訶薩俱不解其意子素曰此謝語卽僧家懺悔也聞
堂大笑而散叔大數日羞見客

弔岳王墓

海門寒日澹無輝偃月堂深晝漏遲萬竈貔貅江上老兩宮環珮夢
中歸內園羯鼓催花發小殿珠簾看雪飛不道帳前胡旋舞有人行
酒着青衣

輟耕錄最膾炙人口者如云云

案此首光岳英華作蕭宇

湖水春來自綠波空林人迹少經過夜寒石馬嘶風雨日落山精泣
薜蘿江左長城真自壞鄴中明月竟誰歌惟餘滿地萋弘血草色年
深碧更多

案此首文翰類選大成作張惟庸

謝宗可

宗可字 金陵人有詠物詩百首傳世

走馬燈

飄輪擁騎駕炎精飛遶人間不夜城風鬣追星低弄影霜蹏逐電去
無聲秦軍夜潰咸陽火吳炬霄馳赤壁兵更憶彫鞍年少夢章臺踏

元詩集卷二十一
二
破月華明

蓮葉舟

穩櫂紅衣泛渺茫
風帆浪槳水雲鄉
曉撐太華半峯月
晚載西湖十里香
藕放雪絲應作纜
荷欹翠柄若爲檣
不須更捧仙人足
太乙真人夢正涼

睡燕

補巢銜罷落花泥
困頓東風倦翼低
金屋晝長隨蝶化
雕梁春盡怕鶯啼
魂飛漢殿人應老
夢入烏衣路轉迷
却怪捲簾人喚醒
小橋深巷夕陽西

賣花聲

春光叫盡費千金
紫豔紅香藉好音
幾處喚回游冶夢
誰家不動惜

芳心韻傳楊柳門庭晚響徹鞦韆院落深忽被捲簾人喚住蝶蜂隨
擔過牆陰

歸田詩話謝宗可百詠詩世多傳誦除走馬燈蓮葉舟睡燕
數篇外難得全首佳者邇見邱彥能誦其賣花聲一首百詠
中不載詩云云

白雁

翅老西風絕點瑕秋江難認宿蘆花雲邊字缺銀鈎斷月下箏開玉
柱斜影亂飛鷗回遠浦陣迷宿鷺落平沙聲聲喚起周郎恨爲帶胡
霜染髻華

七修續稿謝宗可有白雁詩而顧文煜亦有之袁景文有白
燕詩而瞿宗吉亦有之膾炙人口惟謝袁之作也

同根竹

競秀亭亭一種奇
駢頭曾脫錦棚兒
西山二子情依舊
湘浦雙娥影鎖隨
高節元非連理樹
虛心共是傲霜枝
莫教移作仙人杖
恐化雌雄下葛陂

筆精武夷城高巖有巨竹一幹雙梢予與謝在杭欲賦詩詠之未就也偶閱元人謝宗可詩云云似不能復繼矣

句

篩影細分雲縷滑
棋文斜界雪絲乾

月山詩話朱竹垞云網巾之制相傳明太祖見之於神樂觀遂取其式頒行天下三百年未之改然題詠者寡獨藍靜之有二詩余觀謝宗可詠物詩有賦網巾云云蓋元時已有之

矣

郭豫亨

豫亨號梅巖野人

梅花集句

錄十

水沈爲骨玉爲肌好處曾臨阿母池
雪後園林應有恨籬邊屋角立
多時早開却被嬌紅妒未落先愁玉
笛吹要識此花奇絕處滿窗唯
有月明知

李堯夫
虛元贊

毛澤民
曹松

和靖
簡齋

後邨
白廷玉

刻玉雕瓊作小葩溼雲黯澹雪橫斜
半開半落緣誰事和影和香屬
我家數抹晚霞憐野笛一泓流水度
寒沙吟邊苦思無佳句立盡斜

陽數過鴉

趙福元
和靖

程梅窗

程月溪
徐榮

竹塘
應鳳山

黯澹江天雪欲飛屋檐斜入一枝低
禽翻竹葉霜初下春在花梢日

未西晚歲風霜從冷澹小園煙景正淒迷平生慣是思梅苦多謝詩

翁爲品題

陸倉子蒼

和靖

趙天樂張介卿

黃師雄趙愚軒

天寒落日澹孤村占斷風情向小園翠羽啼花追昔夢縞衣和雨立
黃昏蘚厓直上雙飛屣茅店驚寒半掩門憶得去年風雪裏江南石

上對窪樽

東坡方惟深

和靖放翁

陳起程梅窗

陳竹泉山谷

踏破溪邊一徑苔與尋陳迹久徘徊雲漫隴樹魂應斷風靜寒塘花
正開只恐好枝爲雪壓留看瘦影上窗來花前獨立無人會謾使詩

腸日九迴

石屏石屏

呂居仁易涉趣

秦韜玉趙嘏

劉滄元

雪後相看意更深謾將一朵插銅餅人生此樂須天賦歲晚知心唯
月明白鶴未歸春已老危欄倚遍酒初醒逋仙只說香和影不是詩

家莫浪評

道潛雪磯

張逢吉耐菴

東坡柯柏軒

陳月溪劉炎午

勾引春情出苑牆無人知處忽然香愁連粉艷飄歌席亦要天花作
道場風約暗香臨淺水月明疎影媚寒塘浣花溪上堪惆悵可是無

心賦海棠

楊蟠

玉蟾

羅隱

李商隱

貌楷神澤骨槎牙蕭索東風兩鬢華甘與雪霜同冷澹醉看參月半
橫斜溪山冷落泥三尺水竹參差屋數家自笑自吟還自得案頭搖

落小餅花

孤山

東坡

劉斗溪

東坡

榾柮爐寒硯欲冰舍南舍北雪猶存旋催妝額添宮樣靜愛寒香撲
酒樽兩岸嚴風吹玉樹一灣流水護柴門閑中有意堪圖畫溪上無

人月一痕

竹溪

陳寮

于湖

羅隱

半屋蒼雲冷不知茅檐竹隔兩幽奇凝情金谷登樓日依約華清出
浴時隴月定知今夕恨春風搖動故人思綠楊解語應相笑雪裏開

花恐是遲

沈□□□

晁叔用
程梅窗

趙義若
臧謀

梅亭
東坡

滿地飄零更斷腸恐隨春夢去飛揚柳搖臺榭東風軟花撲玉缸春
酒香驛使不來羌管歇燕釵初試漢宮妝巡檐說盡心期事幾度凭

闌到夕陽

張樂□□□

林季謙
韓偓

介甫
晦菴

周詞宰
王叔安

湖山搖落歲方悲自恐冰容不入時但笑紅芳誇豔冶渾將絳雪點
寒枝橋邊野水通漁路城外春風吹酒旗正似美人初醉著澹妝濃
抹總相宜

和靖□□□

東坡
劉禹錫

介甫□□□

東坡□□□

梅花字字香自序余愛梅花自號梅巖野人凡見古今詩人
梅花傑作必隨手鈔錄而歌咏之積以歲月遂成巨編熟之
又久若有所得暇日輒集其句得百篇目爲字字香其閒句
煨意煉璧合珠聯亦有天然之功者吾不知其爲古作也

金涓

涓字道原義烏人本姓劉先世避錢武肅王嫌名改姓金有
青村遺稿

青村遺稿附錄鄭柏撰小傳受經於許謙學文於黃潛隱居
青村學者稱爲青村先生州郡薦辟輒懇謝

又舅孫江書後所著有文集四十卷有湖西集有青村集散
逸莫存家君搜獲及克全叔祖口授者共得詩五十五首又
儒儀叔孔安兄來詩九十七首以續於後

青村遺集宋濂跋右德原先生所和子充王君詩凡一百九
十韻時子充在金陵因黃主簿之官烏傷作詩餞之遂於鄉
中舊遊深致意焉詩止一百二韻凡增多八十有八者乃先

生引而伸之也非維波瀾浩渺不可涯涘而其念鄉學之美
思官政之治實有得古人風勸之義

絕句

燕子飛來近畫簷暮春時節雨纖纖杏花落盡無情緒何處人家有
酒帘

江村

寂寂江村路輕煙晚自生遠峯晴見色獨樹暖無聲渚鷺行看水溪
魚賣入城孤舟人不渡兩岸夕陽明

山莊

青村溪盡處村密隱孤莊石老莓苔路門荒薜荔牆人行秋葉滑鶴
立晚松涼治畝人歸後簑衣挂夕陽

筆精元末金青村涓與邑人吳萊宋濂友善有詩名嘗賦詩云云又遠峯人行云云皆佳句也

葉廣居

廣居字居仲仁和人官江浙儒學提舉

題西泠隱居

瘦木栽冠鶴擎輕十年塵土厭飄零小山舊隱雲封戶大藥新栽月滿庭丹井夜交龍虎氣碧霄春躡鳳凰翎西風客舍炎歊淨擬讀琴心內景經

西湖游覽志築室西泠橋陶情詩酒著有自得齋集自題隱居詩云云

寄楊鐵崖

元詩紀事卷二十二
聞道西湖載酒還飛瓊弱翠擁歸鞍可無私夢登金馬剩有春聲到
玉鑾異國頓消鄉井念小堂新作畫圖看野人未納彭宣履獨向清
溪把釣竿

西湖志餘維禎雅好聲伎名徹都下葉居仲寄之詩云云

吳復

復字子中後改字見心富春人有雲槎稿

西湖竹枝詞

官河繞湖湖繞城河水不如湖水清不用千金酬一笑郎恩才重妾
身輕

歸田詩話西湖竹枝詞和者甚衆皆詠湖山之勝人物之美
而寓情於中大率一律惟二人詩春暉云云官河云云用意

稍別惜不記其姓名

七修類稿吾杭西湖有竹枝詞一帙乃廉夫爲倡一時詩人和者惜無刻本瞿存齋詩話論其二章用意甚佳惜不知姓氏今補於右前乃李介石作後乃吳復作

句

江花多自落天籟或時鳴
雲歸沙嶼白日出水城黃
雲氣上天
星劍溼龜文入地石幢深

西湖竹枝集如云云蓋盛唐之選也

衛仁近

仁近字叔剛一字子剛華亭人至正閒舉幕官張太尉闢延賓館聘之皆謝免

秋夜曲二首

誰家女兒青結螺花前雙歌舞婆娑湘簾在鉤明月多奈此迢迢涼夜何

銀河流光夜初靜姮娥娟娟度鸞影綺疏美人醉方醒倚闌吹簫更漏永

句

江水深深碧梨花淡淡明 九農勞畚耜三泖足風波 亞夫舊是將軍子賈誼初傳太傅官 玉人嬌列錦步障銀筆醉調金縷衣 醉吹銀笛五老洞閒拾瑤草三神山

東維子集城西衛子剛蓋山齋別駕公之孫也首贅詩見余既而復出敬聚齋詩稿一編讀其古詩如秋夜曲白苧詞其

排律如九山讌集五言律如江水云云七言律如亞夫云云
其絕句如消寒圖一首音節興象皆造盛唐

郭鈺

鈺字彥章號靜思吉水人

句

聖賢去我遠縻茲糟粕味當其得意時何如卿相貴

靜思集羅念菴洪先序壯年奔走兵革以爲養晚際明興徵
茂才辭疾不就年踰六十竟貧死獨幸詩歌猶有錄者蓋生
平經歷艱危閭里流離之狀若目見所載郡邑失復月日與
當時死事故實可裨野史憶靜思贈吾族秀賓詩有云云嗚
呼此詩人所以窮餓終身而不悔也

胡布

布字子申盱江人

句

斧斲雲根木瓢探石竇泉 旭日千門曉春花萬樹明 穴深留禹
蹟松古受秦封 夕嶂兼空淨秋江得月多

詩藪盱江湖布子申集十卷中有與方方壺往還題又有寄
倪元鎮詩蓋勝國末人其詩頗能爲古樂府及六朝唐人語
第全篇佳者絕寡又近體拉邏耳然元人遂無一齒及者余
於書肆敝楮中得之大半漫滅惜而摘其數聯如云云咸自
成語至七言歌行佳處往往出元諸名家右而全篇亦寡勻

稱

墨菊

彭澤歸來日緇塵點素絲烏沙漉酒後挂在菊花枝

詩藪子申五言絕亦頗有佳者墨菊云云七言如刻竹題梅
諸絕殊濃麗可觀同時劉紹者有聯句見其集惜不覩全篇
岑安卿

安卿字靜能餘姚人所居近栲栳峯自號栲栳山人

句

蛩鳴深巷靜月昃半樓明 山高不礙夢日落易生愁

筆精岑安卿號栲栳山人有集一卷平淡不類元習如云云
清新有味亦胡元瑞所未覩也

又

平生耕稼心媿此老病軀 老成媿苟得童稚羞無官 我窮不出門頗覺天地窄

元詩選靜能淪落不偶其簡王子英云云又云云又會資敬菴云云何其坎壈抑鬱之甚也

王士毅

士毅字子英餘姚人

句

陶潛千載友相望老東臯

戴九靈集隱居鄉之上林鄰有栲峯岑君先生友也平居好誦陶靖節詩愛其風致絕人有云云之句而自署其號曰東臯處士

朱子範

雪後讀杜詩

十年鄉國亂幾卷杜陵詩閉戶挑燈夜深山積雪時紫陽誇入蜀雙井喜居夔岐路終何適吾將有所思

新安文獻志張外史伯雨云朱子範詩有虞揭遺響

韓奕

奕字公望吳人有蒙齋集

列朝詩集公望生於元文宗時少目眚筮得蒙卦遂扁其室曰蒙齋絕意仕進與王賓偕隱於醫

句

豐年稻熟村如畫南國蓴生水亦香

新秋次韻

官清便似居高品任久長

元詩集卷二十一
如在故鄉

達縣學教諭

樹影不隨流水去荷香常帶遠風來

東湖放舟

西風颯

颯林間葉乍聽猶疑是雨聲

晚晴

四庫書存目韓山人集元韓奕撰其詩古體傷於淺率近體

如云云一知半解尙稍得宋人格律其瓣香當在劍南

劉渙

渙字彥亨紹興山陰人至正間薦授三茅書院山長道梗不

赴卒於洪武間

絕句

二首

白玉搔頭金步搖春衫紅勝海棠嬌只因記得當年事重到桃花第

四橋

鬢薄雲鬟綠霧涼春風額點麝臍黃背人撲得雙胡蝶滿扇薔薇露

水香

明詩綜詩話彥亨受學楊門不離書樓舊染

顧觀

觀字利賓丹陽人官星子縣尉遇亂流寓紹興

過松江詩

吳淞三萬六千頃震澤與之俱渺茫鴻雁一聲天接水蒹葭八月露
爲霜秋風漫引漁人笛落日偏驚賈客航三十年前此來往塵纓猶
未濯滄浪

淞故述顧利賓過松江詩云云

句

重經白下橋頭路頗憶元都觀裏花

藝苑卮言觀送人詩云云吳江詩鴻雁一聲云云此等語參之貞元長慶亦無媿色

沈貴

貴字仲華烏程人

留青日札沈萬三秀名富字仲榮其弟萬四名貴字仲華本湖州南潯人父沈祐始徙蘇之長洲東蔡村貴之子漢傑又徙于化周莊今南京會同館乃其故宅初居東蔡村時人以汙萊之地歸之祐躬率子弟服勞糞治有方瀦洩有法由是致富不貲後流雲南尋命選大戶家爲京官六曹得漢傑之子曰玠者擢員外郎受官辭祿上器重之至今傳二家子孫在流所者尙富或云善點化術

農田餘話古人無畫蒲萄者吳僧溫日觀夜于月下視蒲萄影有悟出新意以飛白書體爲之酒酣興發以手潑墨然後揮筆迅于行草收拾散落頃刻而就如神甚奇特也旣死其弟子沈仲華湖州人傳其法亦佳世多見之

諷兄詩

錦衣玉食非爲福檀板金樽可罷休何事子孫長久計瓦盆盛酒木綿裘

天祿識餘沈富字仲榮行三人因以萬三秀呼之元末富甲天下其弟貴以詩諷萬三云云萬三不聽貴遂隱於終南不知所終洪武初每縣分人爲哥時郎官秀五等家給戶由一紙哥最下秀最上等中又各有等鉅富者謂之萬戶三秀

如沈萬三秀乃秀之三者

舒頔

頔字道原績溪人元末台州學正明初禮聘以疾辭不出學者稱貞素先生有華陽貞素齋集

寄興

湖海半生客乾坤一布衣義哉周伯叔飽食首陽薇

列朝詩集道原辭召之後名其齋曰貞素嘗有詩云云其寄託如此

周必達

必達天台山隱士

題扉上

海角愚夫不自斟妄起關中逐鹿心命運由來非力致項羽英雄亦就擒

壘起雜事方谷珍起兵時嘗造天台山隱士周必達問計必達曰當今四方雖亂君舉義爲天子除逆斯名正言順富貴可致耳餘非我所知也谷珍不別而去必達意珍復來乃題句扉上云云遂攜妻子入山中明日谷珍果來恨不先殺之焚廬而去後谷珍事不成爲兵所困方悔曰不意黃毛野人能料事至此嗚呼晚矣乃投水而死

李序

序字仲倫東陽人有綢緼集

武皇仙露曲

甘泉照月如鈞天千門萬戶生碧煙碧天無雲露盤出明河夜拂金
童仙栖鴉起啼曲城曉大官步進青龍道崑山玉盡武皇老茂陵春
風吹綠草魏人車馬東方來一朝秋燐飛空臺天荒地老骨亦摧三
川白日聞春雷蕙花蘭葉參差起微月斜明光泥泥仙人之淚猶泚
泚

嗽金鳥行

昆明使者南方來洛陽宮闕如雲開玉階奉進嗽金鳥水晶鏤刻辟
寒臺錯金爲屑玉爲餌神刀取腦白龜死美人自搗明月珠赤玉盤
中光靡靡雲高夜啟月當戶展翼垂吭爲君吐白鸞之尾掃成堆瑟
瑟輕黃如粉蠹冶煙五色何氤氲後宮獨賜承恩人雕成宛轉合歡
釧一尺青風袖中軟不知南國江水深鐵箕已盡愁人心岸旁沙隴

高百尺賣兒買得雲南金安得羣飛萬千羽不食珠璣食禾黍嘔出
肝腸奉明主天下黃金賤如土

次韻納齋銅雀臺磚硯歌

銅雀臺傾見荒土月黑妖狐上臺舞千年瓴甌墮人間瑟瑟苔花暗
秋雨天荒地老奈愁何臺上青泥生碧莎斜風吹雨啼蟋蟀此是西
陵長夜歌魏人骨肉今已古漆色凝花人未覩一從爲硯今幾年漳
水滔滔自東去爲君寫作銅臺吟臺前瓦礫猶傷心

元詩選雜諸昌谷集中亦咄咄逼真也

何景福

景福字介夫睦之淳安人有鐵牛翁遺橐

句

繡牀漸覺香毬滿魚艇初疑雪片多
龍吟五夜霜飛瓦鼉吼三更
月滿城 青山自此詩名重采石如今酒價低
荒祠晝掩無人到
苦木叢中春鳥啼 風景不殊豪傑盡新亭誰復淚沾衣

元詩選介夫詩甚奇偉其詠柳絮云云極體物之妙他如云
云亦錚錚佼佼者睦州詩派論之如此

彭炳

炳字元亮崇安人至正中徵爲端本堂說書不就

句

明河夜無聲茅亭四檐月 璧樹落秋子風吹白雲起

元詩選如云云真不減柴桑愚溪品致也

羅蒙正

蒙正字希呂其先廬陵人後徙新會官教授

句

儒冠不是將軍具只作當年措大看
願賜一廛閒養病簡編燈火
伴青衿

元詩選至正丁亥赴省試遇開武銓或勸其借註巡檢不就
以詩答云云後遭亂避地郡城趙式薦於行省授南恩州教
授州判吳元良陰謀割據欲倚其籌畫用爲幕官蒙正悟其
意辭不就後因病以詩謝云云未幾卒

陳德載

德載字

青田人

栽芋

區里饒田早下來綠芽才發旋鋤開添泥善護兒孫長看取秋高掇大魁

栽桂

雲邊移得數株來人老花應次第開儻到兒孫攀折日也須道是阿公栽

元詩癸集至正閒避寇多歷險阻形於詩題曰山村雜興中有二詩期待子孫後孫詔果登洪武庚戌會元其栽芋栽桂詩云云

程從龍

從龍字

嘉魚人

雙洲

涉水逾山竄草萊亂離懷抱幾時開
元家運變黃河徙漢土兵興赤
幟來夜寂埃亭烽火盛月明江艦角聲哀
風沙滿目鄉關異日暮愁
登江上臺

自注元壬辰正月十一日紅巾攻破漢陽十三日破湖廣鄂
漢官民擁舟南遁余家近江室廬煨燼里人相率命歸稍復
故居而號令不一所茭菴舍隨成隨蕪所蓄糧食隨瘞隨啓
遂遁於野艱苦萬狀幸免鋒鏑豈非天相與因紀其事於此
云

韓友直

友直字伯清吳興人隱居不仕

句

元詩紀事卷二十一
一
泉出珠璣千眼沸花開錦繡一庭春

吳興詩選招隱詩云云

潘時雍

時雍字

錢塘人

徐一夔獨樹軒

瀟灑幽軒面水開軒前老樹倚雲栽閒來倚杖過三市醉後支頤看
百回風雨欲隨龍化去雲霄常聽鶴飛來結鄰擬共榮枯事遮莫人
知是散材

東城雜記元末潘時雍居郡城東宋輦院故址有隙地十餘
畝古井一區簡淡力學詩句脫塵嘗賦云云教授海鹽之黃
灣見海宇兵起遂歸抱甕而隱自號灌園生

顧素

素字世通歸安人

句

家人不笑營生拙野老空嘲歷聘忙

湖州府志元末兵亂遷徙不遑未嘗廢學洪武初累聘不起
有云云之句

沈貞

貞字元吉長興人元末隱居自號茶山老人入明不仕有茶
山集

樂神曲

樂神曲者擬楚辭九歌而作也吳人尙鬼祀必以巫覡迎送舞歌

元詩集卷之二十一
登獻其辭褻嫚禳災徼福不知其分滋黷甚矣故爲此辭以明鬼神之理禱祀之意祛其荒淫之志焉

波震蕩兮具區旣底定兮奠神之居
芙蓋兮菱車導翠黿兮文魚神之來兮孰俱後子皮兮前靈胥與神游兮湖之潏衝風息兮極浦有倡兮妙舞有冽兮清酤神飽聿歸兮或返而顧灌吾田兮受神之祐

右太湖神

雄何爲兮厲於鄉祀有時兮享有嘗赭白馬兮青蓋明而無兮晦而在屏方相兮去儺神巫進兮舞且歌雄欣欣兮遠逝不水旱兮不疵厲樂吾民兮世世

右鄉厲

兩旗兮分張舞輕風兮悠揚神之司兮我疆原田每每兮立我青秧

不稂不莠兮無虺無蚘時雨兮時暘俾百穀兮登場維神兮降康報之肴兮蒸腍羊

右青苗神

靜志居詩話集五十卷惜不傳從陳編中搜得樂神曲一十三首不無冗長且多闕文因汰其六稍爲刪易補綴頗覺奇古

案茲又節錄其三

韓介玉

嘲張仲舉

垂柳陰陰拂翠簷倚欄紅袖玉纖纖先生掉臂長街過十里朱樓盡下簾

歸田詩話時揚州方全盛衆素聞仲舉名皆延致之仲舉肢體昂藏行則偏竦一肩韓介玉以詩嘲之云云坐中皆失笑時有相士在座或曰仲舉病鶴形也相士曰不然此淋鶴雨霽則冲霄矣後入大都致位貴顯果如其言

程渠南

渠南字

松陽人

食丁葦戲作

頭子光光脚似丁
祇宜豆腐與波稜
釋伽見了呵呵笑
煮殺許多行脚僧

草木子松陽縣詩人程渠南滑稽之士也與僧信道元同齋食葦道元請渠南賦葦詩應聲云云聞者絕倒

魯琪琳

口占

三百五篇風雅頌世人能讀少人觀吟哦須得自情性雕琢反愁失
肺肝春草池塘中造化梅花香影外波瀾熟參熟究工夫到始信仙
凡共一丹

湖州府志魯琪琳烏程人古樸不樂仕進能詩文沈夢麟叩
其詩法因口占示之云云

元詩紀事卷二十三

侯官陳衍緝

袁介

介字可潛其先蜀人占籍華亭至正間爲府掾

藝苑卮言袁可潛如師手鳴琴流利有情高山尙遠

踏災行

一作檢田吏
作踏車行

有一老翁如病起破衲羶瘦如鬼曉來扶向官道傍哀告行人乞
錢米時予奉檄離江城邂逅一見憐其貧倒囊贈與五升米試問何
故爲窮民老翁答言聽我語我是東鄉李福五我家無本爲經商只
種官田三十畝延祐七年三月初賣衣買得犂與鋤朝耕暮耘受辛
苦要還私債輸官租誰知六月至七月雨水絕無潮又竭欲求一點

半點水却比農夫眼中血滔滔黃浦如溝渠農家爭水如爭珠數車
相接接不到稻田一旦成沙塗官司八月受災狀我恐徵糧吃官棒
相隨鄰里去告災十石官糧望全放當年隔岸分吉凶高田盡荒低
田豐縣官不見高田旱將謂亦與低田同文字下鄉如火速逼我將
田都首伏只因嗔我不肯首却把我田批作熟太平九月開旱倉主
首貧乏無可償男名阿孫女阿惜逼我嫁賣陪官糧阿孫賣與運糧
戶卽日不知在何處可憐阿惜猶未笄嫁向湖州山裏去我今年已
七十奇饑無口食寒無衣東求西乞度殘喘無因早向黃泉歸旋言
旋拭腮邊淚我忽驚慚汗沾背老翁老翁無復言我是今年檢田吏
輟耕錄此袁介踏災行也可以爲民牧不恤民瘼者之勸介
字可潛嘗掾松江蓋能以儒術飾吏事者

蓬窗日錄讀袁介踏災行手錄一通彼苛吏者不惻然可謂
無人心矣

王禎

禎字伯善東平人官旌德宰調永豐有農務集

句

一行已見光如拭再過都無迹可尋

板平

本擬助禾輕著力却憑偃草

重于風

軸輹

禹門似是崇三級巫峽還同束衆流

開水

花徑有同流暗水

桃源誤認出殘紅

溝陰

元詩選每歲教民種桑若干株凡麻苧禾黍牟麥之類所以
蒔藝芟穫皆授之以方又圖畫所爲錢鎛耰耬耜諸器使
民爲之名其書曰農器圖譜農桑通訣如云云皆能刻畫摹

擬曲肖情狀

張端

端字希尹江陰人官江浙行樞密院都事有溝南漫存稿

賓鴻吟

鴻雁來天雨霜鴻雁去春日陽雁來雁去如嘉賓寒寒暑暑愁殺人
一聲叫落秋空雲不覺淚下霑衣巾如賓又復如兄弟吁嗟人兮不
如彼

張仲簡云此數句勝作大篇關係世教

俞俊

俊字子俊

人官平江判官

楚州夜泊

漏鼓聲頻欲四更野航燈火對愁明城頭楚語驚鄉夢船尾吳歌動
客情漠漠水雲聽雁度瀟瀟風雨自雞鳴離羣遠道何嗟及未必江
湖老此生

詩藪全篇整麗首尾勻和

高志道

志道字原朴嘉祥人官安州學正

句

流水落花西子宅故家喬木范家祠

松江府志俞子俊赴平江高原朴贈行詩有云云句坐客笑
曰真堪壯子俊行色矣

陳乾富

元譜紀事卷二十三
三
乾富字

人官副都元帥

蔡九娘詩

一笑花前醉似泥
綺筵歡劇不聞雞
馬蹄到此空歸去
不是花迷是酒迷

瓊臺雜咏至元末敦武千戶蔡克憲之女九娘有姿色副都元帥陳乾富一日引兵就之九娘度來意必強力不能支乃設宴張樂親行酒迭出侍女侑觴乾富歡甚意不相違乃肆意據飲沈醉兵騎皆兼饌人人樂飲恬不爲備九娘乘間避匿乾富醒已侵晨窺其室闐無聲矣覓尋莫知所向悒悒引兵而去賦詩云云

玉環詩

使臺歸騎準鳴笳花氣茶煙競院奢禽慧不須雲板約好窺人意喚
琵琶

瓊臺雜詠至正間陳元帥乾富控制乾寧侍兒賸愛者數十
人惟玉環極殊色髮初覆額爲陳所寵家養秦吉了慧而能
言每呵騶自公府歸必呼玉環報之

陳孔彥

孔彥字子美

人官華亭縣丞

題趙子昂竹石

徒羨芙蓉與牡丹繁華瞬息易凋殘何如竹石常清淡冬雪春風一
樣看

六研齋筆記子昂擬東坡竹石明勾四筆作馬卵石細篠面

元詩集卷之二十三
四
面叢叢不露根節眞所謂篋簾耶石背一梅樹槎枒有勢仍
雜以棘枝古澹之極陳孔彥題一絕云云款云華亭贊邑陳
孔彥題孔彥字士美元之縣丞稱贊府亦科目中人非今佐
領比也

周棐

棐字致堯四明人嘗爲宣公書院山長

句

珥筆每同花下散玉珂時聽月中還
御水滿溝看洗馬宮牆隔樹
聽流鶯

元詩選曹石倉採致堯詩入明詩初集題曰山長集但致堯
送張志學詩云云寄龍子高詩云云似乎官不止山長者

案致堯有臨平道中寄京師諸友末云自慚薄劣頻趨走幾
度因風想玉珂

察級

一作級

級字士安

人自號海東樵者

趙子昂天馬圖

曲江洗刷雲滿身雄姿逸態何超羣眼中但覺肉勝骨幹也合讓曹
將軍嗟哉今人畫唐馬藝精亦出曹韓下玉堂學士重名譽一紙千
金不當價山窗擁雪觀畫圖據案便欲擒於菟大廐真龍有時有杜
老歌行絕代無

六研齋筆記詩云云史官察級士安竹懶曰察級之意似嫌
子昂此馬稍肥故謂曹韓之下橫以時名取重耳求其如杜

老所歌掃空萬馬者則絕代未有也何物胡奴強作解事如此

案記又作海粟作

陵希惠

希惠字季和宛陵人

賦郭用和所藏古鏡

漢皇蛇劍穿屋飛伯禹神鼎淪泗涯鯨翻鼇轉總陵谷此鑒零落何足疑團團知是誰家物偶向耕夫春隴得苔昏土蝕篆文微消盡清光質如石憶昔清光未泯時玉臺顰帶生光輝白髮幾揮豪傑淚青娥曾照嬋娟啼汾陽諸孫誠好古床上書連只環堵聞之不惜抱衾稠豈爲深閨照媚嫵願君試覓負局生炯然秋月高堂明一點莫遣

飛埃侵萬古不滅如此心

句

丹崖雪竇相掩映一枝北走如翔龍白雲輸雨出深谷蒼松倚壁來
清風

宛陵羣英集人傳其賦古鏡詩又有雲松樓詩云云時頗許之

施坦

坦字季平宛陵人

句

香紉幽蘭珮詩裁明月珠 亂聲秋樹葉寒色晚花枝

宛陵羣英集五言佳句如和梅叔章云云劉氏園云云一時

傳誦

熊不易

不易字

宛陵人

句

太瘦尙能憐杜甫不言幾已失聰明

宛陵羣英集如與友人別云云極爲警句

朱得先

得先字

宛陵人

句

戴星問俗千村曙耕雨關山百里春

宛陵羣英集如奉楊明府云云亦工

師晦文

晦文字
宛陵人

句

吠雪從驚犬耕雲欲買牛

宛陵羣英集言懷詩云云

胡晉

晉字
宛陵人

句

茶竈霑晴露書林趁午陰

宛陵羣英集如嘉秀亭云云亦佳

何致中

致中字鶴齡號華陽山人宛陵人

句

苦吟生白髮歸夢繞青山雨久琴絲潤風清扇影閒

宛陵羣英集如秋日云云此類甚多

汪士深

士深字起潛宛陵人

句

雨香林下屐花影席閒尊 白髮已從公道得青山長似故人看

宛陵羣英集如題嘉秀亭云云齋居云云世多傳之

劉得之

得之字

宛陵人

句

登樓須待月稅地亦栽花 風帘桑落酒春網菜楂魚

宛陵羣英集如杭州云云琴高峯云云

梅德明

德明字 宛陵人

句

彩鷁隨風飛宛水黑貂犯雪上金臺

宛陵羣英集如送叔章姪云云頗亦楚楚

吳鎡

鎡字子彥宛陵人官耒陽知州

句

塞翁休問馬海客自盟鷗 泉聲晴亦雨山氣夏先秋

元詩癸集如和鄭仁卿云云象山書院云云皆佳句也

繆思恭

思恭字德謙號菊坡吳陵人至正間官至淮安總管

至正二十年八月十五日招同諸彥小集南湖以杜甫不可久
留豺虎地南方猶有未招魂爲均得不字

我生胡弗辰守土媿簪黻亂離難斯瘼兵氛駕飄拂貴人旣防求苗
獠薦驕拂比戶罹毒淫流殃痛未訖大軍有凶年荆榛莽蕒鬱天地
塞無歡三秋翳沈沕當國哀黎氓方來濫朱紱所冀民社寧優詔非
爲屈頓覺元氣清太空如蕩被借問今夕娛還思去年不

至正庚申倡和詩周伯琦序至正庚申倡和詩爲嘉禾同守
繆君廣文曹君偕諸名輩分均之什也

唐朝

朝字大用桂林興安人官教諭

五無吟六首

與物無心心頗寬無才贏得本無官更無文字勞神思緘口無言漫
自安

此君原是主人翁夙夜惺惺儼在中只爲杜門能謝客一間虛室自

玲瓏

無心

山中古木老槎牙幾度逢春不放花清廟棟梁奚足取霜枝雪榦漫

矜誇

無才

鱸鱖吞香繫釣筒珍禽解語入金籠爲憐蠡鶚能安分自得叢林淺

瀨中

無官

雲在空中變態奇風來江上浪漪漪何如風定雲開後秋水長天一

色時

無文

曉林喜鵲暮林鴉飲啄隨時漫自嘉禍福于人何所與不勞屋角日

喳喳

無言

元詩癸集自號五無齋述五無詩以見志

林彥華號城南黃巖人

戲馬臺

白蛇夜斷飛赤龍長驅疾足平關中鴻門玉碎亞父死彭城霸氣隨
飄風沐猴御尊真成戲調服羣鴛棄天驥一騅豈解踏九州事去空
歌時不利宋公不復登此邱弔古有客悲黃樓

詩藪雄渾流麗步驟中程

程彥明

句

地吞南極盡波撼北溟廻

詩藪元五言律可摘者程彥明云云句格閎整大曆元和閒

李子飛

句

花迎玉殿紅千樹柳拂金沙翠萬條
層嵐蔽日雲當戶陰瀑含風

雪滿床

詳趙孟頫下

丁守中

句

彈琴夜和鳴皋鶴持鉢朝降度海龍

詳趙孟頫下

吳漳

漳字楚望

句

平野北連鐘阜遠大江東抱石城流

詳趙孟頫下

王東

東字尙志廬陵人一云臨川人

句

西風曠野孤城出落日空江白浪迴

詳趙孟頫下

潘伯修

伯修字省中黃巖人至正三年中省試後爲方谷珍所害

燕山秋望三首

西山木落向高風萬壑千厓出梵宮翠幕遙看銀榜合金精虛逐火
輪空枸欄靜立脩脩上冠佩飛行蕩蕩中何日龍船移櫂曉露房雲
水四簾通

遼海東空鶴不歸平蕪遙際極涼霏寒天霜靜雕鷹沒沙苑秋高牧
馬肥落日美人歌玉帳西風獵騎擁金羈豪猪猛起當前立曾冒鳴
弓脫曉圍

北落師門霄漢間陰雲粉沸夜漫山水聲亂趁龍門道月色斜窺碣
石灣劍臥古臺星鬱鬱笳凝幽草露斑斑千秋萬歲滄浪面長照君
王入近關

丙申元旦

元朝舉酒欲傷神六載崎嶇脫死身草木不忘春雨露山川猶擁宿

風塵河南輕重須藩翰江左安危數縉紳家國未知焉稅駕等閒笑
語答時人

元詩選忠君愛國之心藹然溢於言外

王圭

圭字敬仲宛陵人

句

福兼鴻範五瑞集鳳雛三興寄冥鴻外詩成立馬閒

元詩選弟璋字敬叔並以詩名敬仲如挽貢南漪云云戴帥
初過訪云云敬叔詩如題劉御史熙寧諫疏云云謝惠帶鏡
云云皆佳句也時人誦之

王璋

璋字敬叔

句

舉世非新法中朝放直臣
寬覺腰圍減明嫌髻影秋

見上王圭下

李廷臣

廷臣字仲虞台之寧海人學詩於丁復

句

湛露仙盤白朝陽虎殿紅
詔起西河上旌隨斗柄東
西北干戈定東南杼抽空

元詩癸集楊鐵崖序其詩謂如五言律云云置諸少陵集中
卒未能辨也

曹文晦

文晦字輝伯天台人有新山橐

句

剗腸難脫豫且網留骨堪爲子夏冠
鼠鬚過晉今無用兔穎封秦
亦不如 當時照炫水中影今日掃空堂上塵
小槽酒滴清光透
老瓦盆空飲興多 顧家曾識將軍號華嶽堪供處士眠

元詩選輝伯詠十器詩如龜殼冠云云豬毫筆云云雉尾帚
云云鶴子杯云云虎頭枕云云刻畫肖題而全首殊欠雅馴

錢岳

岳字孟安吳興人元季徙雲閒官亳縣丞

靜安八詠

陳檜

上方雙檜鬱嵒嶢不逐禎明玉樹凋雲擁鶴巢溟海暗火枯龍骨良
宮搖深根入地應千尺老榦擎天已十朝夜半木精聽說法昔年亡
國恨都消

靜安八詠鐵崖評曰此章全美

講經臺

潮打彎碕半欲摧老禪稱土

鐵崖評曰二字人未用到處

築高臺旃檀林下談經坐舍

衛城中乞食回江月夜搖金篆冷天風時散寶花來惟餘石塔殘陽
裏長使登臨過客哀

滬瀆壘

袁公築壘吳淞口廢址猶存滬瀆名先駐孤軍防險地已勝癡將假
陰兵濤春海岸喧鼙鼓雲合江天擁旆旌豪傑不將成敗論千年青

史見忠貞

鐵崖評曰知豪傑之不懼者其岳乎

余寅

寅字景晨華亭人

靜安八詠

陳檜

海波浮玉殿寶網拂珊瑚座上來聽法龍精卽老夫

鐵崖評曰五字善融化

鰕子禪

老禪不解事眉白鬢莖稀曹溪一滴水鰕子作龍飛

鐵崖評曰字與奎辭尙意

滬瀆壘

我過袁崧宅重尋滬瀆津英雄千載下遺壘大江濱

鐵厓評曰二十字全美

陸侗

侗字養正上海人

靜安八詠

赤烏碑

金人入夢興梵宗重元始創滬瀆東紫髯紀年石且豐大書赤烏卻
黃龍維松潮汐地不同文章忽瘞洪濤風龜蚌螭首潛無蹤川后河
伯還會通奎星下燭娑竭宮方信人間談色空江水自白江花紅

鐵厓評曰結益精神

陳檜

鐵幹屈左紐苔枝鎖空青雨露承十朝根心自禎明願仗千佛蔭羞
向三閣榮水月照纓絡儼矣大士形秋風動石頭不雜玉樹聲泰媼
永訶護恐化蒼龍精

鐵厓評曰水月照纓絡恐化蒼龍精諸作未能如此想像

湧泉

元氣幹坤軸不舍晝夜旋四五窮其上趵突萬劫泉寧隨月盈縮滾
滾常自然沸如沃焦起汨若尾閭連神虎恥來跑驪龍懼爲淵自天
一數生在理合後先荒哉博望侯空去求河源美彼西方人卓錫良
有緣

鐵厓評曰沃焦尾閭句好一數後先尤見道體

蘆子渡

蘆村胥村南北路舟往舟還古今渡一笠天垂紫鳳飛百枝水落青
龍步鯉魚風起夜未收雪色葦花零亂秋借得君山第三管月中吹
過滄浪洲

鐵厓評曰鯉魚風起忽然出一奇句

趙觀

觀字宗弁澄江人

靜安八詠

赤烏碑

僧來天竺國寺創赤烏年碑碣前朝重文章後世憐秋風生大野斜
月墮重淵有待龜龍負圖書得共傳

鐵厓評曰此一結方是作者

陳檜

不識陳朝檜相傳故老言理文俱左紐后土自蟠根氣迴青山暝陰
寒玉殿昏何須野王筆圖畫至今存

鐵厓評曰用事正切本題

蘆子渡

蘆花十里塘野色正荒涼明月秋無際西風雪有香漁郎茆屋小估
客權歌長自愧無家別經行百感傷

鐵厓評曰雖無意亦自可誦

韓壁

壁字壁翁饒州人

靜安八詠

滬瀆壘

山暝蒺藜黑天寒燐火青將軍身沒後袞海毒蛟腥

鐵厓評曰五字老辣

湧泉

光搖星彩亂聲散雹珠圓不爲將軍拜元機極後先

鐵厓評曰五字有餘妙句

唐奎

奎字文昌晉陽人

靜安八詠

赤烏碑

河水初潤瓠子決東吳漚瀆復漫泄重元不見赤烏碑悵惘波臣心
欲折元龜抃舞蒼龍飛江頭落日楓林稀誰云杜公兩石在安知陵
谷千年非

鐵厓評曰句語超

陳檜

禎明老檜高百尺十畝蒼寒浸苔石虬枝偃如東向松霜皮慘若西
來柏金陵王氣當時誇落日江村啼亂鴉璧月滿天清夜靜玉簫吹
落後庭花

鐵厓評曰一結尤見老手

鯢子禪

誰云儼師示化所餘香未絕天花雨癡禪狡獪悉共知嚼碎紅鬚化

龍舞

鐵厓評曰：鯁句有點丹神奇。

癡禪化去鯁亦存至今法門無盡燈風雨幾度驚山

靈庭前柏樹猶青青

講經臺

師遺臺石蒼苔厚兔葵燕麥生禪肘當時公享七十年石丈人中誰

肯首

鐵厓評曰：著調亦自好。

我來作誌寫長文可歎昔人諛墓金自喜文章如謝朓

涅槃重問遠公林

鐵厓評曰：自高妙不妨。

滬瀆壘

吳淞江上袁公壘千年何處尋遺址石犀半落江水中秋老蘆花三十里五百馬塵今尙飛啾啾赤子將安歸月明古堞急鼓鼙孤臣有淚空沾衣

YORK UNIVERSITY

JUN 5 - 2001

EAST ASIAN STUDIES

鐵厓評曰書生憂國憂民語有足感動人者萬古而不磨

蘆子渡

耶城東來蘆子渡萬頃蘆花失江路明月清秋作雪飛村中不見將軍墓只今海內風塵昏移家來就漁樵倫處處桑麻有閑地紛紛桃李傍公門

鐵厓評曰亦有感慨

涂守約

句

西北窮陰連莽蒼東南巨浸接微茫

詳趙孟頫下



62